



Roek

Gyoengq lwgnyez ceiq maq-muengh couh dwg majhung vaiqdi. Majhung le din ga cix miz rengz byaij roenndoeng, cij ndaej riengz bohmeb bae haw. Aenvih bouxlaux naeuz, duzmax baema cungj vih ndaw ranz doz doxgaiq, sinhoj dangqmaz, sij mbouj ndaej hawj de caiq doz lwgnyez lobw.

Ndigah, haujlai lwgnyez ndaej cib bi baedauq le, cij ndaej gaen bae mbat haw ndeu. Miz haujlai lwgnyez cib lai bi hix mbouj ndaej bae yienhsingz saek baez.

Seizhaenx, aenvih bya sang roen gyae, lij miz gij funghgen swhsiengj banlaux Yauzczu yawjnaek bouxsai yawjmbaeu mehmbwk, gyoengq lwgmbauq Yauzczu byaij ndaej roen gyae le, cij ndaej bae hagdangz, lwgmbwk couh mbouj ndaej doeg geijlai saw lo, aeu gij vah banlaux gyoengqde daeuj gangj “duzma mbouj cae naz, mehmbwk mbouj doegsaw”. Haujlai dahlwg Yauzczu caen mbouj ndaej doegsaw gvaq.

“Gou caemh dwg ndawde boux ndeu—Mbouj ndaej haeu hagdangz doeg saek ngoenz saw.” Ciengj lauxbanj gag riu naeuz.

Coenz vah neix sawj gou doeksaet—Aenvih de daj gyaeu daengz byai cungj dwg yungh Vahbujdungh caeuq dou gangjavah, caemhcai gangj ndaej gig swnh, haxbaenh lij raen de yungh soujgih fat saenqsik hawj bouxcawx dem. Gou caen mbouj saenq de mbouj ndaej doeg gvaq saw.

Caet

“Geiq ndaej bi 2008, giz dou neix ndaej yungh dien le, gou couh cawx densi, cang ‘bahek’ ciepsou saenqhauh couh ndaej yawj densi, menhmenh hagrox gangj Vahbujdungh lo.” De yawj ok dou geij boux cungj gig ngeizvaeg, couh riunyumnyum naeuz.

“Doeklaeng, daengz bi 2017, dou youh ndaej rag gvanghceh, ranzranz ciepgvaghmauh, miz vangiloz yungh le, daihgja cungj cawx dennauj caeuq

soujgih cinwngz. Seizneix haujlai vunzmbanj vanzlij hagrox doenggvaq veizsin, doujyinh cizbo gai huqdoj dem. Ne, haxbaenh gou ngamq ciepg ndaej dan ndeu, ngoenzcog geiq betbak maenz raetlingzcih gvaqbae cijndaej.”

Yawj gij huq ndei baij rim sam mienh ciengz ndaw ranz de, gou haenh de seng’ eiq guh ndaej ndei, baiqfug de dangqmaz. De mboujdan gaenx guh, simhoengh, gaenxmaenx dangqmaz, caemhcai guh yiengh baenz yiengh dem.

Hoeng de youh naeuz, bihaenx mwh cib geij bi gaxgonq gyoengqde ngamq baenzgya, saedceij gvaq ndaej gig hoj. Ranz gezvwnh dwg ciengz-namh vaxdoj, couhcinj ciuq fungsug sibgvenq seiqlengq cungj venj daeng venj geiz, gvanbaz moq cungj daenj buhvaq gyaqciq Yauzczu haenx, hix cw mbouj ndaej gij ndwenngoengz hoj haenx.

Miz dahlwg le, de couh ngoenzngoengz caeuq gvan de daiq ngaiz aemq lwg haeu ndoeng hwnj gocoengz bae gvej iengcoengz, moix boux gvej aen ndoi ndeu. Banringzgvaq, youh bae ra raetlingzcih daengj huqdoj cij dauqma. Saedceij sinhoj ngoenz gvaq ngoenz, menhmenh rom cienz ciengx ranz.

Cigdaengz bi 2003 lajmbanj Yauzczu cij doeng roensuijniz. Gyoengqde rom ndaej di cienz le couh hwnq ranzbingz. Hoeng rag caizliuh hwnq ranz cungj gig nanz, gyoengqde cij guh ndaej caengz ranz iq ndeu.

Bet

Gaenh geij bi neix, caeklaiq miz gij cwngecwz ndei guekgya, bi 2015 mbanjmbanj doeng le roensuijniz. Roen doeng yienghyiengh cungj doeng, mboujdan haeujok fuengbienh, doegsaw fuengbienh, gai huq fuengbienh, daiq rag caizliuh hwnq ranz hix fuengbienh lai lo.

Ciengj lauxbanj gvanbaz youh rom ndaej di cienz le, raen miz haujlai hek diegrog cungj daeuj Mbanjbwzmaj yawj nazmbaeklae, caemhcai ra diegyouq, youh ra dwzcanj huqdoj Yauzczu dem. Raen

ndaw mbanj haujlai ranz cungj hwnq laeuzbezsu guh bouqhek caeuq nungzgyahloz, gyoengqde hix siengj hwnq laeuz moq daeuj guh gaicawx. Hoeng youq Mbanjyauz, dieg gvangq vunz noix, yaek guh ranz, ra doihcaepranz dwg bouh ceiq youqgaenj.

Vahsug gangj ndaej ndei “doxbang doxbaengh, caez youq ndaej maenh”. Daengz ngoenz haigoeng, gyoengq beixnuengx caenik ndaw mbanj minzfung hingseuq lauxsaed neix cungj daeuj bang guh hong. Miz Bouxgun, Bouxcuengh, Yauzczu. Couh yienghneix, sam caengz laeuz moq gyaqciq de mbouj geij nanz couh hwnq ndaej sang’ vauvau lo. Minzczu doxgiet youq gizneix caensaed fatseng, mbe’gvangq.

Caen dahraix, seiqcib bi gaxgonq, Yauzczu yangh laebbaenz le, youq baihlaj Gungcanjdangj caeuq guekgya raeuz lingjdauj, yangh dangjveij, cwngefuj cienzlig gajbienq gij giekdaj sezsih lajmbanj Yauzczu, doidoengh diuz roen gak mbanj canjyez hwnghat, coicaenh ginghci hwnghat. Daegbied dwg gaenh geij bi daeuj duetgungz gunggen caeuq hong saenqhwngh lajmbanj, engq gyavaiq Nanzbingz ginghci hwnghat. Gyoengq beixnuengx Yauzczu saedceij cungj yied gvaq yied ndei, caemh ciemhciemh fouqmiz lo.

Seizneix, gak ranz gak hoh gij dengi ndaw ranz cugciemh boiq caez, yienghyiengh cungj miz. Ca mbouj geijlai moix aen hongh cungj dingz miz ci, lumjbaenz ciq, cibizgaj, cigaj, cimozdoz. Gyoengqde gung lwg doegsaw, hwnj bya guhhong, ok haw bae hangz cungj fuengbienh lai lo. Gaej gangj ganj haw Nanzbingz, couh dwg bae yienhsingz, bae Nanzningz…… Youzcaih de siengj bae couh bae, cwxcaih dangqmaz lo.

Gouj

Ngoenz daihngieih haetromh, bang roeg gwnz faex youq rog cueng heuh cici caca mbouj dingz, hawj gou daj ndaw fangzhwnz ndiu lo.

Gou hwnq congz le, couh bae daengz yangzdaiz, muengh coh gyoengqbya gyae haenx, cijraen ndit

gyanghaet unqswnh saj roengz lajbiengz, sawj gij bya gij faex Sizvandasanh nyumx baenz saekgim liux.

Yawj gizgyawj, raq rumz iq ndeu ci daeuj, lajlaeuz gij va nywj daiq raemxraiz riengz rumz diuq foux, sengdoengh youh gyaeunde. Ndaw biengz fanhfaed cungj hoengh-hwdhwd.

Seizneix, gou gig siengj sikhaek roengz nazmbaeklae Bwzmaj bae, yawjyawj de youq laj ndit gyanghaet dwg baenzlawz yiengh. Daeuj daengz Mbanjbwzmaj le, dingh aeu bae yawj nazmbaeklae, cij suenq mbat neix mbouj daeuj ndwi.

Nazmbaeklae Bwzmaj couh youq baihlaj Mbanjbwzmaj, seizneix miz song bak lai moux, neix doiq ranghdieg Sizvandasanh daeuj gangj, gveihmoz suenq hung lo.

Daj Mbanjbwzmaj byaij roengzbae, song henz bo dwg gij reih haeuxyangz caeuq suenbyaek gyoengq beixnuengx Yauzczu.

Seizneix, cingq dwg seiz sou haeuxlwg bonj dieg, gwnz gyaeu haeuxyangz dingzlai cungj venj rim mumh saekdaep.

Seizhah fwn raq gvaq baez ndeu, diegnamh nyinh, ndit youh cuk. Ndaw suen, byaekmbungj, byaekgep heu-ndikndik; duhnoh baenz nyoemq baenz nyoemq caeuq gvliengz benz rim gwnz duengq. Go namzgva maj ndaej ceiq vuengh, daz seiqlengq bae. Gyoengqde lumj gyoengq dahsien daenj vunj heuoiq riengz rumz diuq foux, miz mbanj caemh foux hwnj gwnz duengq bae lo.

Cib

Mwh dou byaij daengz gwnz dingj nazmbaeklae, yawj ndaej youh gyae youh gvangq. Mwhneix gij naz ngamq maj ndaej mwn, baenz raih baenz raih, heusausau, gyaeunde raixcaix. Seizneix gou couh lumj dahsien daenj diuz vunj saekheu ndeu, youh hung youh raez youh gyaqciq.

Gou ndwn youq laj ndit rongh-gim, mbe hai song gen, singhung baez hemq, gyoengqbya hix hemq dap gou, simsangj dangqmaz. Hemq gaeuq le, couh ing haeu ndaw rungj daihswyienz bae ninz……

Caj gou roengz daengz laj din nazmbaeklae Bwzmaj, mup gij hom gomiu unqswnh youh heuoiq, youh dingq gij raemxrij laelulu haeu ndaw naz bae haenx, gou simsangj dangqmaz.

Mwh gou ngiengx gyaeu muengh song bak lai moux nazmbaeklae neix, roxnyinh gig iengj. Raq rumz liengzsis ci gvaqdaeuq, daiq miz iengcoengz, batgak, go’gvi doengh gij heiq hom neix, sim gou hix riengz rumz fubfed—Doengh nazmbaeklae caengz daeb caengz neix, mbouj caendwg lumj gij saedceij gak minzczu beixnuengx ngoenz beij ngoenz ndei loma?

(2 sat)